

同安縣志卷之四十

方外錄

聖賢之學人道而已出人道則為方外矣考古若王質尹喜張三丰呂洞賓之屬皆方外也而代不數人則以其吐納之術淘鍊之微皆別有真授也邑自宋明而下皆宗孔孟之學一切仙釋虛幻諸學說皆棄若弁髦然高人畸士得道釋之真傳而修養之亦足以達性命之微通天人之故則以此地古稱佛國山川鍾毓之靈固無教不備無奇不有也志方外

唐 黃檗禪師 陳淵 助靈夫人

五代 棲霞禪師

宋 吳本 法周 無着 虛極 陳以文

文翠 通遠仙翁 孫應祖師

元 印空

明 笑堂 吳容 達宗和尚 陳世胄

清 無疑 宗標 曉誠 如壽 明光

同安縣志

卷之四十

人物錄 方外

雪芝 知堅 董蔭 石盎 以正禪師

法相

唐

黃檗禪師卓錫住邑之夕陽山宣宗微時武宗忌之遁迹為游方僧至此黃檗禪師

與觀瀑聯句 閩書

陳淵即唐牧馬侯有神仙道術貞元間為馬監牧馬蕃息能為民禦災捍患歿後鄉

人祀之勅封福佑聖侯賜廟額孚濟 鄭用錫碑記

助靈夫人牧馬侯幽婚林氏女浦邊人也幼嫻慧工巧善蠶織採桑馬坪謁侯廟祈

蠶歸得雙繭異之復詣廟香未熱先煙灼亦不火自焰頃有一白鸞升堂而去夫

人倏歸真鳥人肅衣冠羣拜曰靈果願幽匹侯其轉軀而步語未畢尸移步尺許

遂塑像座右 金門志

五代

棲霞禪師居開元寺以道自高州牧王繼勳將為廣居儲糧辭不受嘗有客來止庵中顧其寒色滿屋解囊金施之雷置諸牀下客去七年復至將更施霞笑曰前惠

尚存出視塵封厚矣客乃歎曰如此道人誰能垢之俛取舊金而去

開士傳
隆慶志

宋

吳本生太平興國四年不茹量不受室業醫濟人無貴賤按病受藥如矢破的或吸氣噓水以飲雖奇疾沈疴立愈景祐年間卒知者肖像供奉屬虔賊猖獗居民詣像請命未幾賊酋喪死人獲寧居乃創祠祀之水旱疾疫款謁如響部使以廟額請賜名慈濟慶元中封忠顯侯開禧三年亢陽爲沴赤地千里獨漳泉來禱歲以大熟鄰郡草竊跳梁界境上忽覩旗幟之異遂洵懼卻走邑人以聞加封英惠侯繇是東逮莆陽長樂建劍西被汀潮以至二廣舉知尊事後累封普佑真君明永樂十七年文皇后患乳百藥不效一夕夢道人牽紅絲纏乳上灸之頓瘥問其居止對以某所明遣物色之云有道人自言福建泉州白礁人姓吳名本昨出試藥今報后后大驚異奏請勅封恩主昊天醫靈妙惠真君萬壽無極保生大帝閩書舊志按真人事跡各志多略而不詳惟前馬巷通判黃家鼎据宋莊郡守夏楊進士志兩碑文李文貞公光地顏校官蘭吳真君碑記暨黃化機譜系紀略楊浚白礁志考證最詳茲照錄之按神姓吳名本字華基號雲冲同安白礁鄉人李文貞謂安溪石門人

同安縣志

卷之四十

人物錄 方外

二

父通封協成元君母黃氏封玉華大仙夢白龜而孕宋太平興國四年己卯三月十四夜大仙夢有神護童子降於庭曰是紫薇神人也越辰誕神生而穎異年十七遇異人授以青囊玉籙遂得三五飛步之法以濟人救物爲念其尤奇者能呪白骨復生背壺盧爲童子或疑其事幻誕不足信然咸豐初年江左八山人亦善此術嘗遇一男女爲盜砍於道腦出脛三斷氣已絕矣有老嫗哭於旁曰三房祇此子今已矣八山人憫之取豆渣代腦削柳條爲脛呪之立活世間不乏長桑君特少見者多怪耳當是時神以醫名天下而又不取人一錢於是同安令江仙官主簿張聖者高其義皆棄官從神游而黃醫官程真人鄞仙姑尤得神秘授仁宗時嘗至京師診帝后疾愈授御史不受神兼通元術明道元年漳泉旱民艱於食神以法輓糧船賑救經月不匱越二年又苦疫神施符水以療存活無算景祐三年五月初二卒於家享壽五十有八或云拔宅飛昇鷄犬皆從世傳劉安王子晉事不盡誣也歿後民有瘡瘍疾疫不謁諸醫惟神是求焚香飲水沈疴立脫於是鄉之父老私謚爲醫靈真人偶其像於龍湫菴溯神靈之護宋也高宗爲太子時曾質於金思歸中原步月崔子廟忽聞廊下馬嘶遂乘之逃金遣鐵騎追至黃

河高宗仰天呼祝忽見神旛蔽天戟鉞如雪金將怯退得從容渡河靖康二年高宗南渡神亦顯靈助戰深夜虔叩始夢示姓名紹興間虔寇猖獗烽火迫境上鄉人鼠竄豚奔相率請命於神不數日官軍斃其酋李三大將餘黨皆就擒睹廟中神像汗透巾帶慶元初寇復至開禧二年賊警徧漳泉皆見忠顯侯旗不敢入界明年丁卯亢陽爲沴赤地千里漳泉民皆泣禱於神甘霖突沛歲大熟民獲奠安更著靈於明代太祖與陳友諒鏖兵鄱陽湖颶作龍舟將覆雲端忽露旗旛大書吳字天遂反風太祖得安成祖永樂間文皇后患乳百藥不效詔求名醫神化道士詣闕牽絲於外診之隔幔灸以艾炷應手而愈問其姓氏官里神以實告且曰臣乃高皇帝鄱陽湖助戰者世傳靈濟二徐真人曾夢中授藥治文皇疾殆神之流亞歟一時廟食徧於郡邑人心皈嚮始終如一也神之封號據福建通志宋開禧三年封英惠侯累封普佑真人泉州府志謂宋慶元中封忠顯侯開禧加封英惠明永樂十七年封恩主昊天醫靈妙惠真人萬壽無極保生大帝漳州府志謂宋乾道間封慈濟真人十五年封顯佑真人寶佑五年封守道真人加封廣惠景定五年封福善真人咸淳二年封孚惠真人德祐元年封普佑真人明永樂七年

同安縣志

卷之四十

人物錄 方外

三

封萬壽無極大帝二十二年封保生大帝尋封恩主昊天醫靈妙惠真人又稱慶元中封忠顯侯開禧初加封英惠侯累封普佑真人安溪縣志稱自宋迄明敕封十五次爲無極保生大帝龍溪縣志稱宋乾道中封慈濟真人海澄縣志稱宋乾道丙戌賜廟號爲慈濟慶元丙辰加忠顯侯嘉定間封英惠侯增康佑侯端平乙未封靈護侯嘉熙己亥晉正祐公庚子從御史趙涯之請改封冲應真人淳祐辛丑詔改廟爲宮莊夏碑稱慶元乙卯封忠顯侯開禧三年封英惠侯楊志碑稱乾道丙戌加忠顯之封嘉定戊辰增英惠之號顏蘭碑稱廟立於宋紹興二十年不言封號其書封號自明始曰洪武五年封昊天御史醫靈真君永樂間加萬壽無極保生大帝道光間黃化機作譜系紀略稱宋乾道元年封慈濟靈官慶元二年封忠顯侯嘉定間封英惠侯寶慶三年封康佑侯嘉禧三年封正佑公四年封冲應真人五年封妙道真君咸淳二年封孚惠真人德祐元年封孚惠妙道真君明洪武初封昊天御史醫靈真君永樂七年封萬壽無極保生大帝洪熙元年封昊天金闕御史慈濟醫靈冲應護國孚惠普祐妙道真君萬壽無極保生大帝光緒初年楊浚作白礁志略與黃化機紀略同但增端平二年封靈護侯一條其謂封

孚惠真君在淳祐五年而無永樂七年封號各家所載紛如惟莊夏楊志俱以宋人言宋事且距里未及三舍距歲不過十紀當較可信乃謂神之卒也或紀景祐六年或紀三年丙子或紀四年丙子按景祐甲戌改元四年後又改寶元則丙子宜在三年其稱四年丙子固誤而云景祐六年尤誤也要之神以醫名而其威靈赫奕乃至於裂赤縣擬黃屋而天下後世翕然無異詞則其能爲民救災捍患又確有可證者矣

法周字覺元王姓八歲出家往開元寺授楞嚴千餘言凡三應詔對咸稱旨賜章服號慧大師咸平中郡守宿翰至寺訪之行殿墀見其下數莖草指問云舊爲紫雲蓋地凡草不生因甚今却有此周應聲曰地因培客士凡草有時生翰深歎服天聖元年跣坐而化茶毗時得舍利開士

無着丞相蘇頌女居平江府資壽寺年三十許厭世浮囂脫去緣飾咨參諸老已入

正信號妙聰禪師

清源文獻

虛極居崑山庵有道行徽宗賜號金壇師

陳以文字文中清修學道居天慶觀三十餘年守倪文節公雅敬之慶元間賜號守

同安縣志

卷之四十

人物錄 方外

四

素冲虛大師

隆慶府志

文翠居嘉禾嶼嘗斷腕燃頂募建普照寺尉滕翔贈以詩曰海翻波浪遶危峯無盡

巖前世界空不是灰心求佛者片時艱住寂寥中

閩書

通遠仙翁先隱於永春樂山後仙去人稱白鬚公初封通遠王嘉祐間以禱雨有驗

加封善利王尋加廣福顯濟咸淳中降真浯洲海印巖輒著靈響祈風禱雨尤有

奇應萬曆間邑劇賊越獄而遁知縣金枝夢登太武山遇神示賊處躬渡海詣祠

以禱如夢指果得賊因捐金新其廟宇

滄海瑣錄 參閩書

孫應祖師仁德里孫厝人其母孕六月而生少具慧眼咿咿學語卽異儕輩鄉多器重之比長皈依佛教尋師至太湖結廬居焉木魚貝葉靜懺前愆苦修數十載能預識休咎以之勸化頑民及祈雨輒應遠近咸以神僧目之應笑曰余不過靜以理推何神之有衆生徵逐名利心多罣礙恐忤故理之至淺者多昧而不明豈真有智愚之別哉時高浦社連年蝗災鄉民窮於捕治應惻然憫之欲大施法力慮爲人知轉滋疑惑適社中演劇應往觀以所食饅頭碎之投四方作片片舞觀者大譁謂和尚不惜五穀應翩然徑去蝗害遂絕所居茅廬僅容膝晚年蓋一寺杉

料均購自遠方艱於運載應以術俾杉浮於寺前因以浮杉巖名其額寺至今香火不絕圓寂時九十有七明敕封惠應祖師許希仁探補

論曰靜以理推即濂洛關閩惟靜故明心法祖師真解人哉

元

印空自構一堂名水月辟穀十餘年日食棗栗松實後坐化遺軀猶存通志

明

笑堂湖頭村人永樂時住太武巖有二徒之京送以詩云客路逢秋意慘悽吳歌楚些聽如迷海天一色雁雙去山月半規猿自啼心動故園頻入夢詩逢好景易成

題孤霞落窈西風外更向何山去託棲其二徒皆有詩名閩書通志府志滄海紀遺全閩詩話

吳容少游吳削髮歸僧因習岐黃術還溫陵遂以方藥濟世生平廉恕不苟取李光

縉為作傳景壁集

達宗和尚能詩學辟穀嘗謂盧若騰曰公牧馬侯後身改號牧洲加馬名當得第每盧至歡然款接遇俗客則崖岸自放人呼為傲和尚一日過澤畔有兩童子浴鴨拍手曰傲和尚來矣達宗戲擲鴨鴨浮海去童子牽衣泣拜達宗笑曰還爾鴨鴨

同安縣志

卷之四十

人物錄 方外 五

仍在故處嘗登嘯臥亭四望東指曰不週一甲海中當生一大都會即臺灣也後

坐化閩語洲見

陳世胄字允冕陽翟人明季邑諸生俗呼泥鰍以多髯也有異人來往其齋三年授以六壬術精易理所占驗奇中遂棄舉業後忽秋試人疑其入彀歎曰不堪言也是秋父死闈中持喪歸人益異之順治戊子在嘉禾里數云同安血流溝安海成平埔嘉禾斷人種泥鰍死半途回至沙溪而歿葬後門外御車巷後其言皆驗其

術無傳通志府志舊志雍正志稿合參

清

無疑戒行端嚴順治戊子屠城枕尸塞路率其徒達因等七人親為拾尸昇往郊垵化以火仍掘地十餘丈瘞之而標其墓曰同歸所漳州被圍死者數萬解圍時無

疑又偕諸徒往收瘞焉終於長興甘露寺舊志

宗標字良準號觀幻林氏子生而不凡有長眉僧見而器之幼即厭暈年十七入開元寺為僧往福清黃檗寺受戒於廣超禪師授以拂未幾廣超寂化宗標為建塔治喪歸隱本寺之清居寮究明宗乘三十餘年學者畢集康熙戊子福清紳士請

繼槩山祖席期滿告歸辛丑說法雲齋閣甲辰福清當道泊諸檀齋再請到槩山道望益隆辛亥泉紳士請歸本寺戒壇開戒時年已八旬後三年入寂著有諸錄八卷爲佛門所宗春坊林之濬爲之序

端平巖僧曉誠獨居巖中數十載戒行獨異他僧唐孝本宰邑時適六月大旱誠跣坐炎蒸中水漿不入口者數日與約某時不雨願焚身至期果大雨如注後凡遇旱輒命誠禱之無不應

如壽博通內典善摹趙文敏書法行楷皆秀麗絕倫詩亦有致晚年與阮旻錫唱和

錫爲選其詩三百餘首名爲偶然草

參府志

明光能詩尤工於草書法祝枝山時出入於二王之間奉母甚孝住泉城之開元寺準提閣

雪芝工草書尤精於畫蘭淡濃疏密曲盡其妙名播遠近後住武夷山

知堅住太平巖預知死期置酒別所知交共七人命寺僧設八人坐次其弟子曰何用過多堅曰卽有至者方欲就席果復有人至酒數行起曰予欲拜佛西歸矣人皆笑者有尾其後者見其甫及禪牀已圓寂衆始信之

同安縣志

卷之四十

人物錄 方外

六

董蔭古坑人善幻術人呼爲蔭仙康熙間游泉城居停洪姓者相得甚歡偶以貧爲言蔭仙笑曰從吾教巨富立致令多市紅梅鹽漬之又刈胎稻晒乾儼往三山出七書曰視橋頭有七丐投之如其言丐得書竟去越數日福州疫啖其梅瘥又數日馬疫啖其稻瘥遂大獲貲比歸則蔭仙已先兩日辭去已而委蛻於家有章外委進省忽遇之大橋書畫坊章故與善不知其已死蔭仙徐出白金寄其子再往

蹤跡之則杳矣

竹畦文抄

石盜不知何許人有仙術石溪黃某幼病瘖乾隆二年年十七偶鋤於田或過而詢曰汝病瘖乎吾稔一能醫者引汝醫黃首肯卽輟鋤偕之行初過幾村落後遂越澗渡嶺茫然莫辨其所向約行十里許至山巔見崩屋數椽引者曰此醫啞先生廬也黃入門見一老叟危坐鬚眉俱白兩眉長過項驚異而拜叟曰爾欲醫乎日晡矣且飯少頃命侍具六饌不嘗者不識卽嘗者亦不識也飯畢叟手持藥似竹葉者三投茶銚中烹之令飲飲訖卽能言黃詢曰此何地也叟曰此十八面山也相傳文圃周環視之山各有面面凡一十有八故以十八面山稱之又詢姓及名叟具告之且曰爾欲酬我須十日內遲則無及矣引者仍引之歸時夜深月黑兩

足如風輪疾捲頃刻抵家而引者忽不見黃抵家大呼啟門家人驚因詳述其故
達旦鄉里皆異之曰此仙者也當亟訪之攜酒醴香鈔從數十人往文圃覓盜盜
已不知所在舊志

以正禪師不知何許人嘉慶間住後浦天妃寺戒行勝他僧游擊陳名魁從學棍法
一日有鳳陽婦手執旂爲踏索戲以正棟鍋蓋繫童背令權持之卽走勿返顧童
如教婦顛童疾走刀剪滿鍋蓋而童弗傷又有失路夫婦叩寺求宿坐定以正託
沽酒出告鄉人曰寺有強人其助我鄉人持梃踵之以正執鐵杖先入兩人已伏
門後衆排牆進兩人者固健鬪大呼曰和尚爾敗矣以正氣懾之逾時兩人並殲
焉已移住眞君廟廟鄰某夜必過談一夕久不去問故曰有村嫗投宿以正跌足
曰其墮人胎造孩子酒者亟歸緩將無及令排闥入自躡其後某妻早奄奄垂斃
婦亟走尾及雙山下杖死之旋有爲婦修怨者數用幻術以正悉法解之後不知
所之或曰往廣東羅浮山金門志

法相梵天寺僧嘉慶間住持後浦北鎮廟習醫又學拳深自晦一日偶歸梵天路出

西安橋有授拳者素狎暱欲與角藝再三謝某疑爲怯暇時試揮拳來不獲已姑

同安縣志

卷之四十

人物錄 方外

七

與較勝之某大恚恨一日見其俯市蔬遽以鐵鎚槌之死東竄臺灣衆僧訟不能
捕數年潛歸適李振青爲邑宰夜夢曰僧仇至矣在松柏林某家店樓幸無失如
其言往果搜出一鞫而伏杖斃之